

欒城縣志卷十四

藝文志 著述 碑碣

著述

閉戶著書豈徒消磨歲月哉古人不朽有三立言與立德立功並重發明經義攷訂史文固裨益于斯世卽一吟一咏亦足覘抱負窺底蘊然則辛苦纂集傳諸今者聽其烟盡灰飛不爲之少惜焉可乎哉可乎哉志著述

唐

蘇味道集十五卷

閻朝隱集五卷

欒城縣志

卷十四

著述

閻鏡幾集十卷

以上見唐書藝文志

元

蘇天爵元朝名臣事略十五卷

簡明目錄云所記元代名臣事蹟

始穆呼哩終劉因凡四十七人

元歐陽位元朝名臣事畧序

應奉翰林文字趙郡蘇伯修甫年弱冠卽有志著書
初爲胄子時科目未行館下士爭言詞章講誦既有
餘服用筆札又富君獨博取中朝鉅公文集而日鈔
之而凡元臣世卿墓表家傳往往見諸編帙中及夫
閒居紀錄師友誦說于國初以來文獻有足徵者彙
而萃之始疏其人若干屬以其事中帙被讐櫛去而
導存扶隱而蒐逸久而成書命曰國朝名臣事畧他
日余與伯修同預史屬從藉讀之作而嘆曰壯哉元
之有國也無競由人乎若太師魯國淮安河南楚諸
王公之勳伐中書令丞相耶律楊史之器業宋商姚
張之謀猷保定藁城東平鞏昌之方畧二王楊徐之

辭章劉李賈趙之政事與元順德之有古良相風廟
恒山康軍國之有士君子操其他臺府忠盡之臣惟
幄文武之士內之樞機外之藩翰班班可紀也太保
少師三太史天人之學凌川容城名節之特異代豈
多見哉至于司徒文正公尊主庇民之術所謂九原
可作我則隨武子乎嗟夫乾坤如許大人才當輩出
伯修是編未渠央也
姑志余所見如是云

元文類七十卷目錄三卷

簡明目錄云成于元統二年凡分四十有三類所錄
著作自元初迄延祐去取極精審故與姚鉉唐文粹
呂祖謙宋文
鑑鼎立而三

治世龜鑑一卷

簡明目錄云天爵再任浙江行省參知政事時作凡
六目一日治體二日用人三日守令四日愛民五日
爲政六日止盜所採皆宋以前善
政嘉言而大旨歸于培養元氣

滋溪文稿三十卷

簡明目錄云天爵學出安熙而詞章淹雅根柢深厚
波瀾意度出入歐蘇乃過熙不可道里計碑版諸作
尤足補
史闕

滋溪詩稿七卷

松廳奏疏五卷

春風亭筆記二卷

黃河原委

遼金紀元

以上見元
史本傳

讀詩疑問一卷

衛王事迹

太宗實錄

兩漢詔令以上見錢大昕補元史藝文志

李冶測圓海鏡十二卷

簡明目錄云其書以勾股容圓為題自圓心圓外縱橫取之得大小十五形皆無奇零次列識別雜記數百條以窮其理次設問一百七十則以盡其用所演秦九韶立天元一法為唐順之顧應祥等不解則精妙可知矣

阮元重刻測圓海鏡細草序

測圓海鏡何為而作也所以發揮立天元一之術也算數之書九章尚已少廣著開方之法方程序別正負之用立天元一者融會少廣方程序而加精焉者也李敬齋自序稱老大以來得洞淵九容之說日夕玩繹而鄉之病我者使爆然落去而無遺餘蓋其精心孤詣積累數十年而後能神明變化無不如志若此洎乎明代算學衰歇顧箬溪應祥作測圓海鏡分類釋術測圓算術等書

以立天元一無下手之處每章輒刪去細草而但演開帶從諸乘法舍其本而求其末不知妄作之罪應祥實無可辭焉

國朝梅文穆公肄業

蒙養齋親受

聖祖仁皇帝指示算法始悟西人所譯借根方卽古立天元一之術流入彼中者於所著赤水遺珍中論之甚悉于是立天元術又得章明文穆之功斯爲鉅矣其爲術也廣大精微無所不包大之而躔離度數小之而米鹽凌雜凡它術所能御者立天元皆能御之自古天文家若元郭太史守敬所造授時術中法號爲最密而其求周天弧度以三乘方取矢亦用立天元術載在授時術草者可覆而按則其爲用亦神矣哉以元論之又非獨如是已也今歐邏巴本輪均輪橢圓地動諸法其密合無以加矣原其推步之密由于測驗測驗既精濟以算術則有弧三角法所以算弧三角者則有八線表所以立八線表者則先求六等邊四等邊以至十四十八等邊其求十八等邊四等邊二法則用益實減實歸除所謂益實減實歸除者究其實卽借根方借根方卽立天元一然則西法之精符天象獨冠古今亦庶幾元術

有以資之也試以是書所列一百七十問反覆研究於
之于二千年以來相傳之五曹孫子諸經益無以逾其
精神又證之以數萬里而外譯撰之同文算指諸編實
不足擬其神妙而後知立天元者自古算家之秘術而
海鏡者中土數學之寶書也惜流傳之本不可多得元
視學浙江從文瀾閣四庫書中抄得一本甯波教授
丁君小雅燕又以所藏舊本見贈但通之者鮮因屬元
和李君尙之銳算校一過其文字隱奧難曉及立術于
率不通者李君又雜記數十條于書之上下方蓋敬齋
此書爲數百年絕學元知學友中惟尙之獨能明之其
精遠妙悟卽今之敬齋也且其所以發明古人之術闡
釋

聖祖之言者爲功亦鉅矣哉歙縣鮑君以文廷博請以是
書刊入知不足齋叢書第二十集卽以畀之及其刻成
而爲之
序如此

敬齋古今註八卷

簡明目錄云其命名不甚可解疑爲塞聰專思之義
或作古今難字之誤也原本久佚今從永樂大典錄

出其書皆訂正舊文以攷證佐其議論詞鋒峻利博
辨不窮雖間或橫生別解有意翻新而大致皆有根
據不同子
虛騁浮詞

壁書蕞削十二卷

益古衍疑三十卷
按簡明目錄益古衍段二卷

泛說四十卷

古今難四十卷

敬齋文集四十卷
以上見元史本傳

明

馮相延生至寶十卷
見本傳

陳九德經濟文編十二卷
採訪

國朝

張麟正樹德堂詩稿一卷

王琮訓後遺言一卷

喪禮正宗一卷

王崐樂愚齋詩存一卷

以上見本傳

鄧咸中西園詩存

無卷數

鄧諧百城書屋賸稿

無卷數

鄧興業萬竹山房詩鈔

以上見陶梁畿輔詩傳

鄧湘霖第二槎亭吟草六卷

第二槎亭續草二卷

六影詞鈔六卷

大翻山房集四卷

雲衣集二卷

避債臺傳奇二卷

焦虞盛四留堂詩集三卷

聶玉階蒼雨亭詩稿一卷

十七史蒙求註釋二卷

張潤德明紀評二十卷

史鑑摘錄三卷

以上俱
採訪

碑碣

金鑄銘石鑄字是謂不朽昔闔駟據柏人城碑以爲舜
納于大麓之迹古碑足攷經史信可寶已鑿邑石刻唐
以前無徵焉今廣爲搜羅叙以世代復以廟學城垣橋
梁寺觀分列之併標識撰題名氏建立年月而以唐碑
總彙于前若文之無闕政治沿革及名人芳踪者概置
弗取庶幾字省事該永留古蹟于罔替志碑碣

唐建永橋碑 永徽四年十二月

馮夷息浪尉侯無驚窮手足于一身視蒼生之如子識吾
英遠允協物議行稱鄉曲信著閭閻歲次星紀月維大呂

遂于程村之南浚水之上立永橋一所勒翠石于往古示
不朽于來茲頌曰公志博施濟川道長化及士女攜手同
行日有婆伽住諸寶相爰捨奇賄割捨名珍濟彼沈溺修
此梁曰勒銘翠石永刊深仁

此碑正書在城西陳村西南浚河故道側碑高建初尺
七尺寬四尺字大一寸共三十三行每行五十三字筆
法適媚字多奇古但文剝落太甚茲節其顯然共辨者錄于右

唐欒城縣孫氏紀族碑 儀鳳三年

孫福善撰
孫仲景書

唐欒城縣孫陽施石臺銘 開元丁卯歲

趙撰撰並行書以上
二碑見寶刻類編

唐董日進等造石浮圖記

天寶十一載八月十三日造

石側五行行書左側五行正書按此石本在欒城道光
間沈太守濤攜至正定今權奇崇因寺中文載常山貞
志石

唐欒城令劉沔遺愛頌

大歷五年

鄭級撰趙舍書
見寶刻叢編

以上唐碑碣五

元欒城縣重修廟學碑記

大德五年

欒以晉大夫欒貞顯春秋時我朝當南北衝民貧戶寡吏
以免責平遷為幸興學設教殊未遑也東陽田君茂來主
邑簿下車謁廟相學顧瞻荒涼喟然曰人卓爾霄壤間守

綱常由禮義生樂而死安不蚩蚩異類者非

夫子化育功耶遂銳意興學以故規狹隘購地于縣治之
東剪荒夷翳補坳平埴以築以構明年而禮殿告成厥志
未終及瓜以去大德三年馬君彥文由樞密院都事出尹
茲邑才優理劇不數月政清民悅謀于監縣渥洼石主簿
張仲謙等曰凡吏于民食于民也食怠于教教而無所依
歸可乎哉終前人丕緒職有在矣卽捐月俸以倡其僚吏
民助貲源源而來晨夜展力百廢並興而民不加賦政餘
日事董作勞悴不恤也踰年購兩廡神門東西齋櫺星門
一十五楹像設儼備輪奐一新仍禮師儒召鄉邑俊秀入

學間督諸小吏與聞講解大義由是漸摩樂育蒙者以開
悍者以化熙然有樂土之風焉同僉樞密院事張君子惠
邑人也樂其鄉大夫之賢命予識其事且請垂訓以勗鄉
之子弟子謂古設庠序學校皆所以明人倫也明倫本于
身修原于心正蓋人可以參天地贊化育者此心而已故
聖賢立教以存心爲本齋莊敬一以存其體大中至正以
存其用窮萬理以致和敦倫常以力行一旦自明而誠酬
酢萬變觸處洞然至于仁熟義精纖悉曲當于以裁成輔
相不難矣生斯時也由王宮國都下逮閭里家塾學罔不
設其爲制也廣故其成才也多由束髮爲士以論選賓興

之法上及公卿大夫其爲教也切故其及物也深此先王
化美風厚之源布之方策諄諄致詳者歟自秦以來古義
蕩盡後之學者鮮不泥于訓詁詞章惑于異端百氏誘于
決科干祿甚者沈迷奔競戕其配天之大體罔然以死嗟
夫豈天之生材不古若耶學之名同而學之實異也今是
邑方始興學教者審思學者勤勉庶無負賢大夫卓越有
爲之意乎

右碑正書在縣學翰林院侍講學士中順大夫知制誥
同修國史郝采麟撰中憲大夫同僉樞密院事張汝書
丹翰林院學士中順大夫知
制誥同修國史楊文郁篆額

元欒城縣學田記

至大二年七月十五日

樂學無田其來已遠教官蒞職但食諸生束修之奉而已
號寒啼饑蓋有所未免故往往不能滿秩縣豪傑僉樞張
浹字子惠弟澄三原宰郭貞正卿首割已業以畀之富室
董恪杜瑞泊弟秉彝耿鳳見義勇爲從而附益又以錢五
百緡具祭品僉樞公復施諸書一萬卷于是講授之席不
虛而釋奠之儀克舉闔境化之文風丕變駸駸乎齊魯之
鄉矣主簿梅濟濟川將勒諸石昭示悠久命教諭劉澥以
文請余嘉諸君之用心樂爲之書至頃數詳在碑陰

右碑正書在縣學中憲大夫同僉樞院事張浹書丹保
義校尉欒城縣主簿梅濟題額正大夫征東行省參知
政事王思
廉撰文